



Sud Bosne i Hercegovine
Суд Босне и Херцеговине

Broj: S1 3 Iž 039141 20 Iž
Sarajevo, 14.12.2020. godine

Sud Bosne i Hercegovine, u drugostepenom vijeću sastavljenom od sudija Zvezdane Antonović, kao predsjednika vijeća, Dr Branka Moraita i Mirsade Džindo, kao članova vijeća, odlučujući o žalbi političke stranke "Narod i Pravda" (NiP), Sarajevo, Hakije Kulenovića 12, zastupana po predsjedniku Elmedinu Konakoviću, koja osporava Odluku Centralne izborne komisije BiH o odbijanju zahtjeva za ponovno brojanje glasačkih listića u osnovnoj izbornoj jedinici Bugojno za nivo Općinskog vijeća, broj 05-1-07-1-1496/20 od 09.12.2020. godine, u nejavnoj sjednici, održanoj dana 14.12.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum u uvodu, odbijen je kao neosnovan zahtjev političkog subjekta „Narod i pravda“ za ponovno brojanje glasačkih listića na osam biračkih mjesta u osnovnoj izbornoj jedinici Bugojno.

Protiv ove odluke žalitelj NiP je izjavio žalbu zbog povrede zakona i pravila izbornog procesa, nepotpuno i nepravilno utvrđenog činjeničnog stanja i pogrešne primjene materijalnog prava. Žalbom ukazuje da je njihov zahtjev od strane CIK BiH paušalno odbijen, navođenjem odredaba pravilnika koje regulišu načine glasanja, ali da je suština u tome da su onemogućeni akreditovani posmatrači da prate proces glasanja, čime je povrijeđena odredba člana 5.26 Izbornog zakona BiH, prema kojoj se detaljan tabelarni prikaz rezultata glasanja izlaže na biračkom mjestu a kopija istog uručuje akreditovanom posmatraču. Navode i povredu člana 17.9 Izbornog zakona BiH, te da im nedostaje 20 glasova u osnovnoj izbornoj jedinici Bugojno da bi osvojili 2 mandata u Općinskom vijeću.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da **žalba nije osnovana**.

Centralna izborna komisija Bosne i Hercegovine, je u konkretnom slučaju, ispitala sve navode zbog podnesenog zahtjeva za ponovno brojanje i pravilno utvrdila da nisu nađene nepravilnosti koje mogu uticati na rezultate glasanja u osnovnoj izbornoj jedinici Centar Sarajevo, koji se odnose na plasman kandidata NS, podnosioca žalbe. Kako nalazi i ovo vijeće Suda Bosne i Hercegovine, CIK BiH je pravilno utvrdila činjenično stanje i donijela pravilan zaključak o tome da u zahtjevu za ponovno brojanje, koji je pravilno odbila, jer nisu navedeni opravdani razlozi za ponovno brojanje glasačkih listića u predmetnom slučaju. Takva ocjena proizilazi iz činjenice da u zahtjevu nije naveden približan broj glasačkih listića za koji se tvrdi da nisu ispravni, tj. suprotni odredbi člana 5.30 stav (4) tačka 3) Izbornog zakona BiH. Pored toga, u zahtjevu nije ni navedeno kako povreda Izbornog zakona utiče na rezultate izbora u smislu pravilne primjene odredbe člana 5.30 stav (4) tačka 3) Izbornog zakona BiH, niti je u zahtjevu navedeno kako povreda Zakona utiče na izborne rezultate u vezi s odredbom člana 5.30 stav (4) tačka 4) Izbornog zakona BiH. Pravilno je utvrđeno činjenično stanje po kojem je podnosilac žalbe u osnovnoj izbornoj jedinici Bugojno za nivo općinskog vijeća osvojio 749 glasova i jedna manmdat, dok je politička stranka SBB ispred podnosioca žalbe, jer je osvojila 866 glasova i dva mandata u općinskom vijeću Bugojno, tako da razlika od 117 glasova ne utiče na pravilno utvrđene izborne rezultate.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81 stav 1 Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A
Zvezdana Antonović**